

Mendranzes: 94 mile euro de manco, demò per endèna

La Conferenza de la Mendranzes linguistiche de la Provincia de Trent se à binà te Comun general de Fascia

Sèn Jan - Con tempes tardives, dant per l'ensediament del nef goern provinzial e dapò sperlongèda per l'catif temp, en vender ai 22 de firé te la sala del Consei del Comun General de Fascia l'è stat endrezà la XXVIII Conferenza de la Mendranzes, che aldò de la Lege provinziala nr 6 del 2008 la cogn dèr sie parer obligatorie sul program di intervenc per l'editoria e l'informazion e sul fondo provinzial per la mendranzes. Per solit la conferenza vegnìa chiamèda ite dant de la fin de l'an per dezider i intervenc per l'an dò e poder donca poèr via con la desvaliva attivitàdes. Per ch'est entardivament desvaliva attivitàdes, desche la programazion de la trasmission per la televizion ladina, no à amò podù poèr via, ajache la istituzion no pòde dèr sù la encòries per la produzion.

L'impat no è stat di miore, ajache la proponenta del Fondo provinzial per la mendranzes portèda dant dal bilanz de previzion 2019-2021 à metù dant n stanziament de 675.000 euro, smendrà de ben 94.000 euro respet a chel del 2018, che l'era de 769.000 euro. Stanziament che, considran i empegnes jà touc e na pèrt tota dal bilanz 2020 porta a na soma de 686.000 euro.

Dò l'illustrazion de chise impore, portèda dant da la funzionaria del Servije Mendranzes Paola Gualtieri, che à portà ence l salut de la dirigenta Marilena Defrancesco, l'è stat l nef dirigent general Giovanni Gardelli a spiezifichèr che l smendrament vegn cà dal fat che al scomenz de ogni legislatura ge vel fèr n bilanz tecnich, e l'è sottrissà che, canche vegnarà aproè l nef bilanz, l stanziament vegnarà integrà per l fèr ruèr a la somes de l'an passà, senza cognèr chiamèr ite n'otra outa la Conferenza. Con chesta arsecurazion l'è stat domandà e otegnù l parer a favor de d'uta la Conferenza.

La scontrèda se aea avert con l salut de la senadora e procuradora Elena Testor, che da patrona de cèsa ge à dat l benvegnù al president de la Provincia Maurizio Fugatti. L nef goernador provinzial, te sie prum intervent a ch'est apuntamento important de la mendranzes e soul esponent de la jonta de Trent prejent, f'è sottrissà la considrazion de ch'est esecutif per la mendranzes, pèrt fondamentèla de due i teritories che la Provincia vel arvejinèr e valorisèr travers i "Stati Generali della Montagna", percorsi teritoriali che pearà via la setemènes che vegn. A la fin Fugatti à rebadi sie



La Conferenza de la Mendranzes metuda a jir te la senta del Comun General de Fascia.

enteress per chesta scontrèdes, che permet de cognoscer miec la problematiches de la mendranzes, dajan sia desponibilità a endrezèr la Conferenza ence più outes a l'an.

Intervenc di raprezentanc de la mendranzes

L'aprijiamet per la paroles de Fugatti è stat palesà ti intervenc de desvalives raprezentanc de ladins, mochege e cimbres, che se à augurà na atenzion per la mendranzes linguistiche del Trentin amancol valiva a chela desmostrèda dai amministradores de la legislatura passèda, speran magari te n saut de calità amò maor. I raprezentanc mochege e cimbres i à uzà fora l problem del spopolament de si teritories e i à palesà speranza e sodesfazion ence per la prezenza de Gardelli, responsàbol de la Umst (Unità missioni strategiche) provinziala Coordinament Enc Local, Politiches teritoriales e mont. L funzioner da man sia à rengrazià l goern provinzial per ge aer dat sù ence la competenza su la mendranzes linguistiche, che ge stès n maie a cher.

A la Conferenza à tout pèrt ence i ombole de Moena, Soraga, Sèn Jan,

Mazin e Ciampedel, la Sorastanta de la Scuola de Fascia, i president de l'istitut Cultural, de l'Union di Ladins de Fascia e de l'Union Generala di Ladins dla Dolomites.

L president de l'ICL Antone Pollam à rejonà del problem de n compart amministratif sot dimensionà per l'grif peis burocratiche pervedù: se la Provincia no troa la vida de l slijer o de smaorèr l personal, l'atività di picol enc che fèsc cultura no pel più jir inant. Pollam à dapò ence domandà cont de la situazion per la restruturazion de la Ciasa de la Moniaria e per l projet de na sezion permanenta del Museo su la Gran Vera a Moena.

La Sorastanta Mirella Florian à rejonà del percorsi AntropoLad, domanan che vegne metù en doura normes acioche l posse doventèr titol de abilitazion per i insegnanc e la presidenta de la Generela Milva Mussner à rengrazià per l bon sostegn che da egn la Provincia de Trent ge dèsc a La Usc di Ladins, sottrissan la gran emportanza per la promozion linguistica che à l soul sfot dut per ladin, che apede a la funzion de fèr informazion f'è ence chela de fèr crescer n maie de joegn te la profesion giornalistica e te la cognoscentza del



lengaz travers stage o colaborazions desvalives.

La procuradora Testor à rejonà del besegn per Fascia - a desferenza di etres raions a risech de spopolament - de lurèr per l'inclusion de la jent che vegn da fora. A ch'est e al lengaz ladin te familia e te anter i più picol ge vegnarà dedicà ence l program de l'Aiscia Ladin 2019. La Procuradora à ence volù rengrazià la Provincia per aer seghità a finanzièr la sotescrizion al NPLD, de chel che la responsabola di Servijes linguistiche del CGF Sabrina Rasom è

vizepresidenta; l'organism europeu per la promozion de la mendranzes è considrà defat da la senadora Testor de gran emportanza.

En ultima l Conseier ladin Luca Guglielmi à palesà sie aprijiamet per i intervenc de Fugatti e Gardelli e f'è rengrazià l President percheche l'ègn dur per l'assessorat regionel, sottrissan de esser desponibol desche pont de referiment no demò per i ladins ma ence per i mochege e i cimbres.

Lucia Gross

Chisc i finanziament aproé

L Fondo provinzial per l stravardament de la mendranzes del Trentin per l'an 2019 è spartì a chesta vida. A la letra a) l'è i intervenc de sostegn a l'informazion ti lengaz mendres, con n stanziament de 381 mile euro che tol ite l finanziament a la stampa (La Usc di Ladins e la plates per mochen e cimber che vegn fora vigni 15 dis dui sfots local), ai programes per televizion che va fora sul canal TML

e a la trasmission ladines che va fora a Radio Studio Record. A la letra b) troon i intervenc metui a jir diretamente da la PAT per 30 mile euro; con la letra c) l'è i projec e scomenzadives cernui da la jonta e proponec da istituzions e amministrazion per 104 mile euro e con la letra d) i finanziament a l'ativitàdes culturèles e de politica linguistica del Comun General de Fascia per 140 mile euro.